


Vischnaunca da Medel/Lucmagn



**Lescha davart las zonas da ruaus per las
selvaschinas ed igl uaul
per la vischnaunca da Medel/Lucmagn**

Sin fundament digl artechel 27 dalla lescha cantunala da catscha dils 4 da zercladur 1989 relai la vischnaunca da Medel/Lucmagn la suandonta lescha.

Art. 1 Intent

La zona da ruaus per selvaschinas ed uaul ha igl intent da proteger la flora e la fauna d'in diever public excessiv. Surtut duei la selvaschina buca vegnir disturbada en ses quartiers d'unviern per evitar donns vid la vegetaziun.

Art. 2 Territoris

La zona da ruaus per selvaschinas ed uaul cumpeglia ils territoris indicai ella carta geografica 1:50000 ni marcadas sco sendas da viandar. Duront il temps menziunau eis ei scumandau da bandunar quellas vias.

Art. 3 Scamond

Naven dils 15 da december entochen ils 30 d'avrel eis ei scumandau da passar ellas zonas fixadas, respectivamein eis ei lubiu da traversar ellas mo sin las vias indicadas ella carta geografica 1:50000 ni marcadas sco sendas da viandar. Duront il temps menziunau eis ei scumandau da bandunar quellas vias.

Art. 4 Agricultura e selvicultura

L'agricultura e la selvicultura vegnan buca restrenschidas ella zona da ruaus. Tut las activitads agricolas e forestalas ein lubidas. Il scamond da bandunar las vias e las sendas vala buca per quellas activitads.

Art. 5 Excepziuns

Il scamond da bandunar las vias e sendas vala medemamein buca per persunas d'uffeci en execuziun da lur funcziun (selviculturs, luvrers d'uaul, organs da survigilonza da catscha etc.) sco era per lur persunal auxiliar.

Art. 6 Tegias da cuolm e controllas da baghetgs

Igl access allas tegias da cuolm sco era per controllas da baghetgs che sesanflan en las zonas da ruaus ei garantius da tut temps als possessurs.

Art. 7 Indicaziun dallas persunalias

Tut las persunas che sesanflan denter ils 15 da december ed ils 30 d'avrel el territori menziunau, ein obligadas d'indicar lur persunalias sin damonda dils organs forestals, dils organs da survigilonza da catscha e dils funcziunaris communals che selegtimeschan sco tals.

Art. 8 Surpassaments

Surpassaments da questa lescha vegnan puni sin fundament digl art. 47 dalla lescha cantunala da catscha.

Aschilunsch ch'il dretg federal e la lescha da catscha cantunala fixeschan buca enzatgei auter sedrezza la procedura tenor l'ordinaziun penala cantunala.

Art. 9 Midadas

Las zonas da ruaus per selvaschinas ed uaul san vegnir midadas ni cassadas d'in onn a l'auter entras conclus d'ina radunanza communal.

Art. 10 Approbaziun e vigur

Questa lescha ei vegnida approbada dalla radunanza da vischnaunca dils 15 da december 2005 e passa immediat en vigur.

Il president communal:

Claudio Simonet

Il canzlist communal:

Valentin Pally